

Nov gieu da lingua

«La Cumbinella» – in gieu per emprender rumantsch

■ (LR/mg.) Dacurt è sorti da la stampa «La Cumbinella». I sa tracta d'in gieu per emprender rumantsch, edì e concepì da la Lia rumantscha tenor il sistem Kommis, inventà, sviluppà e realisà da la chasa editura «Marcoli» Turitg.

Kommis, in gieu innovativ

Kommis «La Cumbinella» è in gieu da chartas cun differents pleds che ston vegnir cumbinads a frasas cumpletas. El permetta d'emprender rumantsch en moda activa e divertenta. Quest gieu da lingua motivescha las scolaras ed ils scolars a furmar adina puspè novas frasas, augmenta la fantasia e la construcziun e diminuescha il squitsch da prestaziun.

Kommis augmenta il stgazi da pleds, meglierescha l'abiltad linguistica ed approfundescha la grammatica. L'effect d'emprender linguas cun Kommis è grond. Las reglas èn simplas ed ins po a medem temp exercitar e rir. Ins po giugar en dus u en pliras persunas, en gruppas, cun uffants u creschids. Il gieu s'adatta per l'instrucziun, ma era per giugar en famiglia.

Furma e cuntegn

«La Cumbinella» è vegnida realisada en rumantsch grischun a basa da la versiun franzosa Kommis «Bonne Chance!». Ella cumpiglia 3 sets a 100 chartas, concepids tenor differents grads da difficultad (set 1: principiants, set 2: avanzads, set 3: profits). Las chartinas cuntegnan ils pli differents pleds (substantivs, verbs, adjectivs, preposiziuns, e.a.), necessaris per far frasas cumpletas. Mintga set ha ultra da quai 8 jokers che remplazzan in pled giavischà. Quests jokers cuntegnan fotografias da persunas e simbols dal mund rumantsch. Ils 3 sets pon vegnir cumbinads u duvrads independentamain in da l'auter.

Pretsch e vendita

Il Kommis «La Cumbinella» po vegnir retratg per 12 francs/set da la Lia rumantscha, Via da la Plessur 47, chasa postala, 7001 Cuira (telefon 081 258 32 22, fax 081 258 32 23, e-mail: vendita@rumantsch.ch) u da tuttas librarías e butias che vendan cudeschs rumantschs.